



21 de marzo de 2012. A proposta de ampliación da Rede Natura 2000 de Galiza presentada pola Xunta en 2011 e cuxa exposición pública vén de rematar, confirma a vergoña de seguirmos coa Rede Natura máis cativa de todo o estado. As afirmacións dos actuais responsábeis políticos que cualificaron esta ampliación de "definitiva" e "completa", amosan claramente non só a súa incompetencia, senón tamén unha ilimitada desvergoña. Trátase dunha proposta claramente **insuficiente, incompleta e incoerente**, sen fundamentación científica nenhuma legal, apoiada en inexactitudes e xustificada con trucos e demagogoxia. A Xunta resolveu recurtar drásticamente o patrimonio natural galego para llo entregar ás eólicas, eléctricas, aos promotores e aos donos das canteiras e das piscifactorías.

[Alegacións AMPLIACIÓN RN 2000 \(1 .47 Mb\)](#)

ALEGACIÓN DE ADEGA Á PROPOSTA DE AMPLIACIÓN DA RN 2000

CONSIDERACIÓN XERAIS

1. Unha proposta insuficiente e trucada: A proposta de ampliación da Rede Natura 2000 apresentada pola Xunta en novembro de 2011 pretende elevar a porcentaxe de territorio galego baixo esta figura de protección dende o actual 12,1% ao 15,2%. Concordando en que, tal como se di na introdución da memoria da proposta, a porcentaxe por si soa non debe ser determinante para acadar unha correcta representación dos hábitats e especies recollidos nas Directivas DC 92/43/CEE e DC 79/409/CEE, no caso galego a superficie da ampliación proposta non se corresponde coa riqueza e a biodiversidade presente no país e, portanto, incumpe o establecido nos artigos 2.1 e 2.2 da Directiva 92/43/CEE cuxo obxectivo é "... contribuir a garantir a biodiversidade mediante a conservación dos hábitats naturais e da fauna e flora silvestres no territorio europeo dos Estados membros..."

, (art. 2.1), e

“...o mantemento e restablecemento nun estado de conservación favorable, dos hábitats naturais e das especies silvestres de interese comunitario...”

(art. 2.2).

Dende ADEGA acreditamos na insuficiencia territorial da proposta presentada para protexer acaídamente a biodiversidade do país a teor, en primeiro lugar, do recollido na [páxina oficial](#) [1] da Xunta

encol da riqueza da biodiversidade galega por atoparse nunha “zona de transición entre a rexión eurosiberiana e a mediterránea, o que unido a unha variada climatoloxía e á complexidade estrutural, tradúcese nunha flora e fauna relativamente diversas”. No noso país están presentes 56 dos 121 tipos de hábitats naturais presentes no estado, entre eles 10 dos 56 considerados prioritarios, que acollen “unha das máis ricas representacións de flora e fauna da Península Ibérica”. Non alcanzamos a entender como Galiza, cunha das comunidades biolóxicas más diversas de Europa, pode ter incluido só o 12,1% do seu territorio (15,2% na proposta de ampliación) na Rede Natura mentres que Asturias e Castela-León, comunidades veciñas e coas que partilla numerosas características bioxeográficas, teñen acollido baixo esta figura de protección o 29% e o 26% do seu territorio.

Por iso resulta sumamente chamativo que para xustificar a súa proposta, a todas luces insuficiente, a Xunta pretenda comparar a porcentaxe acadada neste alongamento (15,2%) coas doutros estados europeos, en lugar de facelo coas comunidades veiñas ou mesmo coa media estatal, o 28%. Deixando á marxe o feito de que a comparación entre dúas categorías non equivalentes (comunidade autónoma de Galiza e estados europeos) alén de ser pouco rigoroso, podería ferir determinadas susceptibilidades derivadas dun rancio “chauvinismo” por parte da administración e institucións estatais, non deixa de sorprender que á hora de comparar a extensión da Rede Natura entre comunidades autónomas fágase en termos de superficie absoluta e non de extensión relativa. Deste xeito, resulta obvio que as comunidades más extensas, como Andalucía, Castela-León e Castela-A Mancha son as que tenden a ter más territorio protexido en termos cuantitativos.

Todos estes argumentos e subterfuxios no tratamento dos datos non deixan de ser para ADEGA un pobre intento por parte da Xunta para xustificar unha proposta de ampliación misérrima, que en absoluto está á altura da riqueza e diversidade dos hábitats e especies naturais no noso país.

Outra proba disto é que na introdución do documento faise un percorrido histórico pola tramitación institucional das diferentes propostas e alongamentos da Rede Natura 2000 en Galiza. E neste relatorio é salientábel a ausenza de referencia algúns á proposta de ampliación elaborada pola propia Xunta de Galiza e datada en maio 2008, que se ben non se chegou a tramar, sí foi obxecto de consulta e debate por parte dos membros do Consello Galego de Medio Ambiente e Desenvolvemento Sustentábel (COGAMADES). Esta proposta, considerada polos representantes dos colectivos de defensa ambiental como “de mínimos” visaba un alongamento da Rede Natura galega até o 18,3% do territorio, lonxe aínda da media estatal do 28% e da representación que esta figura ten nas comunidades veciñas.

Compriría avaliar tamén as razóns que moveron a un instituto de investigación como o IBADER (Instituto de Biodiversidade Agraria e Desenvolvemento Rural), dependente da USC, a elaborar dúas propostas de ampliación da Rede Natura 2000 galega cualitativa e cuantitativamente diferentes: a elaborada en 2008 e a actual de 2011, máxime cando os membros das equipas redactoras foron prácticamente os mesmos.

2. Unha proposta incompleta: A teor das incertidumes xurdidas sobre a fundamentación científica da ampliación de 2011, por mor das manifestas diferenzas entre esta e o documento de 2008 (ver apartado anterior), cabe preguntarse se foron os criterios científicos os que inspiraron a actual proposta. Estas dúbidas vense acentuadas polo feito que na proposta de 2008, o IBADER propuña a incorporación de novos tipos de hábitats a teor da actualización da información bioxeográfica, a unha millor interpretación da área mariña e costeira, a unha millor caracterización dos humedais, e a unha tipificación dos ecosistemas boscosos más acaída á información científica dispoñible. En consecuencia, a incorporación destes novos hábitats redundaba nun alongamento da superficie dos actuais LICs e na designación doutros novos. Estas incorporacións están usentes da proposta de 2011.

ADEGA lembra á administración que “segundo o establecido no dereito mediambiental da UE e confirmado o Tribunal Europeo de Xustiza, a designación de lugares da Rede Natura 2000 só

debe facerse segundo
[posta](#)

[2]
[do Comisario Potocnik](#)

á pregunta escrita E-9181/2010 dirixida á Comisión e presentada polo grupo Verdes-ALE do Parlamento Europeo, interesándose pola proposta de ampliación da Rede Natura Galega. Na Decisión da Comisión Europea, 2004/813/CEE, do 7 de decembro de 2004, pola que se adopta a listaxe de Lugares de Importancia Comunitaria da Rexión Bioxeográfica Atlántica (DOUE L 387, 29/12/2004), formúlase para o ámbito do estado español a necesidade de mellorar a representatividade de determinados tipos de hábitats, contando en Galiza cos tipos prioritarios Queirogais húmidos atlánticos de zonas temperadas de

Erica ciliaris

e

E. tetralix

(Nat-2000 4020*) e as Turbeiras altas activas (Nat-2000 7110*), así como o hábitat de interese comunitario asociado a estes, os Mires de Transición (Nat-2000 7140). Transcorridos 7 anos dende a publicación desta Decisión, e perante a renuencia do estado español e da Xunta de Galiza a ampliar a representatividade destes hábitats insuficientemente recollidos no noso país, a Comisión Europea volta a lembrar por boca do Comisario Potocnik e en

[resposta](#)

[3]

[a unha nova pregunta escrita do grupo Verdes-ALE](#)

(E-000364/2011) que

“os hábitats

de interese comunitario 7110 «Turbeira alta activa» e 7140 «Turbeiras de transición e flotantes» non están suficientemente representados na región de Galiza”

polo que o

“Reino de España debería designar como LCI

[LIC]

varias zonas más para cubrir as insuficiencias observadas en Galiza”

. E na Decisión 2006/613/CE da Comisión, do 19 de xullo de 2006, pola que se adoptaba a listaxe de Lugares de Importancia Comunitaria da Rexión Biogeográfica Mediterránea (DOUE L 259, 21/9/2006), especificase a necesidade de mellorar a representatividade no ámbito do territorio español de distintos tipos de hábitats, entre os cales atópanse dous con presenza en Galiza: os Bosques aluviais de

Alnus glutinosa

e

Fraxinus excelsior

(Nat-2000 91E0*) e os Prados de sega de baixa altitude (Nat-2000 6510).

Neste senso, á vista da actual proposta de ampliación e tal como se expón nestas alegacións nos comentarios referentes a cada LIC, o actual documento resulta manifestamente incompleto por non incluir unha acaída representación territorial da totalidade dos hábitats e especies de interese europeo, e moi especialmente daqueles para os que a Comisión ten advertido da súa

criterios científicos”. Tal é a [res](#)

insuficiencia.

Como exemplo representativo de que a actual proposta de ampliación non está en absoluto completa, como se ten dito por parte dos actuais responsábeis de Conservación, referimos o caso dos hábitats de turbeiras. Resulta chamativo que malia a estar amplamente documentado na bibliografía científica a presenza destes hábitats na maioría das serras litorais galegas e en particular na [Serra do Barbanza](#), este espazo fica sorprendentemente excluido da actual proposta, cando no documento de 2008 constituise como un dos LICs más extensos de nova creación. A información sobre os hábitats de turbeiras, particularmente sobre as turbeiras de cobertor (7130*) coa que conta o Ministerio de Agricultura, Alimentación e Medio Ambiente, (Banco de datos da biodiversidade) reflicte tamén a presenza de

[amplas áreas deste hábitat en Galiza](#)

[4]

, de xeito que o noso país é o que ostenta a maior superficie de todo o norte peninsular. Desgrazadamente, a actual proposta de ampliación da RN 2000 de Galiza non recolle non de lonxe a totalidade da superficie ocupada por este hábitat prioritario, ao contrario do que acontece en Asturias, Cantabria, Euskal Herria e Navarra. E, para o caso concreto da Serra do Barbanza, a documentación técnica do ministerio amosa novamente a presenza destas turbeiras.

3. Unha proposta incoerente: A Directiva 92/43/CEE de Hábitats consagra no seu artigo 3.1 a creación da Rede Natura 2000 que é considerada

“unha rede ecolóxica europea coerente composta polos lugares que alberguen tipos de hábitats naturais que figuran no Anexo I e de hábitats de especies que figuran no Anexo II”

. Para millorar esta coerencia ecolóxica, o artigo 10 dispón que os estados membros *“esforzaranse por fomentar a xestión dos elementos da paisaxe que revistan primordial importancia para a fauna e a flora silvestres. Trátase daqueles elementos que, pola súa estrutura lineal e continua (como os ríos coas súas correspondentes ribeiras ou os sistemas tradicionais de deslinde dos campos), ou polo seu papel de puntos de enlace (como as pozas ou os soutos) resultan esenciais para a migración, a distribución xeográfica e o intercambio xenético das especies silvestres.”*

Trátase de que os LICs estén interconectados entre si através dunha rede de corredores ecológicos para garantir a mobilidade natural e, portanto, a viabilidade dos elementos da biodiversidade presente nestas áreas.

Para ADEGA, a proposta de ampliación en tramitación incumpe claramente ambos os dous artigos 3 e 10 da Directiva de Hábitats ao non contar con suficientes corredores ecolóxicos para garantir a conexión entre os actuais LICs. No noso país, a presenza dunha densa e extensa rede fluvial así como as numerosas serras e cordais que cunha orientación preferente N-S que limitan distintas unidades xeográficas, debería ter sido aproveitada na actual proposta para o establecemento destes corredores. Deste xeito acadarían tamén máis representación en Galiza os tipos de hábitats cuxa insuficiencia foi reiteradamente sinalada pola Comisión Europea: as turbeiras e os queirogaís húmidos da rexión bioxeográfica atlántica, frecuentes nas serras litorais, dorsal galega e serras interiores e os bosques aluviais propios dos ríos tanto da rexión bioxeográfica atlántica como da mediterránea. Porén, e en comparación coa proposta de ampliación da RN 2000 de 2008, a proposta de 2011 amosa unha ostensíbel carencia de corredores ecolóxicos e, portanto, unha menor coerencia.

CONSIDERACIÓNNS ENCOL DAS AMPLIACIÓNNS DE LICs e LICs DE NOVA CRIAZÓN

En aplicación dos argumentos desenvolvidos no apartado das consideracións xerais, pasamos a sinalar algunas deficiencias atopadas na actual proposta de ampliación da RN 2000 con referencia a cada espazo:

1. AMPLIACIÓNNS

Carnota-Monte Pindo: Da actual proposta, e con respecto ao documento de 2008, desbotáronse as conexións entre o espazo interior e o litoral no treito entre O Ézaro e Cee e o que é máis grave, [desaparece a prevista ampliación do LIC nas serras litorais de Muros, Carnota, Mazaricos e Serra de Outes](#)

, con presenza de humidaís e hábitats de turbeiras, o que duplicaría a superficie terrestre deste LIC. Casualmente nestas árees excluidas están previstos varios desenvolvimentos eólicos e canteiras a ceo aberto.

Fragas do Eume: Segue a ser significativa a ausenza da zona do Pico Vello, amezada por unha [explotación mineira a ceo aberto de andalucita](#). Falla a conexión co LIC Xubia-Castro e coa serra da Cova da Serpe através da Serra da Loba. Ambas as dúas conexións estaban contempladas na proposta de 2008.

Costa da Morte: Segue sen estar xustificados dende un punto de vista científico e da representatividade dos hábitats e especies presentes nestas áreas os ["buracos"](#) e [recurtes territoriais nos lugares de Camelle](#) e Arou casualmente coincidentes coa ubicación das piscifatorías “Xandriña” e “Camelle” respectivamente, previstas no Plano Acuícola.

Corrubedo: Parécenos acaída a incorporación da zona da Laxe Brava, en Corrubedo, feito curiosamente coincidente co resolto nunha rexente [sentenza do TSXG](#) que declarou ilegal a piscifactoría prevista nesta zona. Sorprendentemente, outra área con similares valores naturais, a da Penisqueira e a costa de Aguiño (Ribeira), con presenza de hábitats dunares e matogueiras halófitas, fica excluída (hai proposta unha macrodepuradora). Suprímense tamén con respecto á proposta de 2008 [outras áreas no perímetro do Parque Natural de Corrubedo](#), concretamente nos lugares de Vixán e A Graña, na contorna da lagoa de Vixán, e que poderían funcionar como áreas de amortecemento e corredor.

Xubia-Castro: A prevista ampliación deste LIC deixa fóra a conexión coas Fragas do Eume

como xa se indicou no apartado correspondente a este espazo.

Río Tambre: A ampliación deste espazo manteñeo desconectado do LIC Esteiro do Tambre, do que por certo cáese tamén a inclusión da Illa da Creba e parte da costa de Outes e Boa (Noia). Pérdese deste xeito a oportunidade de conectar todos os espazos da bacía do Tambre através dun corredor ecolóxico.

As Catedrais: Queda fóra da ampliación, sen xustificación algúns dende o punto de vista ambiental, o treito de costa no concello de Ribadeo coincidente coa [proposta piscifactoría de “Corvo”](#), do Plano Acuícola, área que ademais podería actuar como corredor entre este LIC e o Río Eo.

Foz-Masma: Ao contrario do que acontecía na proposta de 2008, a ampliación deste LIC deixa fóra un importante treito de costa no concello de Barreiros, que ademáis o conectaría co LIC das Catedrais, casualmente coincidente cun territorio no que se teñen perpetrado importantes ilegalidades urbanísticas.

Carballido: A ampliación proposta é moi escasa e, ao contrario da proposta de 2008, deixa a este espazo desconectado dos LICs A Marronda, Negueira e Ancares-Courel.

Negueira: Ao igual que co LIC Carballido, este espazo fica desconectado dos outros LICs próximos (Carballido, A Marronda e Ancares-Courel) perdéndose a oportunidade de dotar de coerencia ecolóxica a unha importante área das serras orientais

Baixa Limia-Serra do Xurés: Acúsalose unha importante redución de superficie (arredor do 25%) con respecto á proposta de 2008 no concellos ourensáns de Baltar, Calvos de Randín, Verea, Bande e Cualedro.

Macizo Central: Apresenta unha considerábel redución da súa superficie en comparación co documento de 2008, que atinxe a áreas cunha boa representación de bosques aluviais mediterráneos: Bacías do río Xares (concellos de A Veiga e O Bolo); do Návea (Pobra de Trives); e a vertente oeste do río Conso (Vilariño de Conso).

Serra da Enciña da Lastra: Fica na actual proposta desconectado do LIC Añcares-Courel, mentres que na proposta de ampliación de 2008 a Serra de Vilamartín actuaría como corredor.

Canóns do Sil: Ao contrario do [previsto na proposta de 2008](#), este LIC fica desconectado do LIC Añcares-Courel pola non inclusión dun corredor fluvial ao longo deste río, área actualmente ameazada por varios proxectos hidroeléctricos.

Ulla-Deza: Este LIC que actualmente abarca dende a desembocadura até a metade do concello de Touro (parroquia de Bendaña) debería ampliarse até o encoro de Touro (nº 2) para que un dos poucos treitos libres de encoros no Ulla estivera protexido.

2. LICs DE NOVA CRIAZÓN

Serra de Foncuberta: Sufre unha importante einxustificada redución que atinxe ao corredor ecolóxico para a conexión co LIC Negreira, deixando fóra as serras de Liñares, Follabal e Inveral, así como tamén á bacía do Navalvo. Este espazo fica tamén desconectado da bacía do Eo, e dos LICs da Marronda e Carballido. Na proposta de ampliación de 2008, estas áreas fican moito mellor representadas coa crialón dos LICs “Terras de Burón” e “Bacía do Eo”.

Brañas do río Calvos: A proposta deste pequeno LIC xunta co das Veigas do Salas e as Brañas de Golpellas supón unha importante merma con respecto ao que na proposta en 2008 supuña a ampliación do LIC Baixa Limia-Xurés, fundamentalmente cara o este, nos concellos de Baltar e Cualedro.

Serra do Suído: Pérdese unha importante superficie, especialmente no concello de A Lama, sí incluída na proposta de 2008, e coincidente con previstos [desenvolvimentos eólicos e canteiras](#).

Asemade, a serra do Suído fica desconectada da bacía do Verdugo-Oitavén.

Serra de Oia: Ao igual que na proposta de 2008, a extensión protexida desta serra litoral [non está suficientemente representada](#)

atendendo á presenza de hábitats de interese europeos e mesmo prioritarios (turbeiras). A prevista ubicación dos parques eólicos previstos (por exemplo Albariño I e II) semellan condicionar más a proposta de cría de este espazo que a necesidade de protexer todos os hábitats naturais de interese.

Costa de Oia: O mesmo pode dicirse deste espazo con respecto á exclusión das áreas de instalación das piscifactorías de Orelludas e Mougás.

Illia de Cortegada: Fica desconectada do sistema fluvial Ulla-Deza xa que, ao contrario que a proposta de 2008, non se inclúen o esteiro e os lombos do Ulla nem os litorais de Rianxo, Catoira e Vilagarcía.

Miño-Neira: Este novo LIC sufre unha [importante redución](#) (842 ha) fronte ás 18.210 ha contempladas na ampliación de 2008. Malia á importante representación de comunidades naturais ripícolas, con 5 hábitats de interese europeo, un deles prioritario e especies en perigo de extinción (mexilón de río) que mesmo levou a declarar áreas como a bacía do río Loio como ENIL (Espazo Natural de Interese Local), a actual proposta esquece incorporar esta extensa área fluvial á proposta galega da RN 2000. A maiores, este novo LIC que se estende por un importante treito da bacía do Miño, fica desconectado da Bacía do Eo, o LIC Ancares-Courel e o Canón do Sil, perdéndose a oportunidade de afortalar a coerencia ecolólica dunha ampla área no centro-este do país.

Por todo o anteriormente exposto, **SOLICITAMOS** que tendo por presentadas as presentes alegacións, a Xunta modifique a actual proposta de ampliación da Rede Natura 2000 atendendo aos criterios, propostas e deficiencias sinaladas nelas. En todo caso, dende ADEGA consideramos como documento de mínimos e proposta de partida a ampliación elaborada polo IBADER en 2008.

Compostela, 15 de marzo de 2012

Asdo. Fins Eirexas, Secretario Executivo de ADEGA

SR. CONSELLEIRO DE MEDIO AMBIENTE, TERRITORIO E INFRAESTRUTURAS

[1] Ligazón: <http://www.medioruralemar.xunta.es/areas/conservacion/biodiversidade/> [2] Ligazón:

<http://www.europarl.europa.eu/sides/getAllAnswers.do?reference=E-2010-9181&language=ES>

[3] Ligazón:

<http://www.europarl.europa.eu/sides/getAllAnswers.do?reference=E-2011-000364&language=ES>

[4] Ligazón:

http://www.magrama.es/es/biodiversidad/temas/red-natura-2000/7130_tcm7-24149.pdf